

Friday, May 16, 2025

Time - 2:30pm

CM

Chief Minister Pu Lalduhoma'n nizanah sorkar website pahnih Pakistan in an hack thu a sawi.

Vawiina Dawrpui Multipurpose Centre, Digital Transformation Conclave wawi 17-na a hmanpuinaah Chief Minister chuan a sawi a. Nizana sorkar website hack te hi reiloteah lak let leh a nih thu sawiin he thil thleng hi fimkhur nana hman a pawimawh thu leh cyber security chak leh rintlak zawk nei zel tura fuihtu ni se a duh thu a sawi a ni.

Digital Transformation Conclave hmanpuitu Chief Minister chuan vawiina hun an hman chu tunlai thiamna lama punkhawmna mai ni loin hmasawmna thlen kawnga tunlai thiamna hman tangkai a, sorkar thawm chak nana hman tur leh mipuite dawmkang tura hna thawh bul tanna pawimawh tak a nih thu a sawi a, a kaihhruai ZPM sorkar tirh kum 2023 December thla atangin digital lamah nasa takin hma an lak thu sawiin Mipui Aw, Kai App, internet kaltlanga damdawiin OPD card lakna leh a dang te bakah sorkar hmasawmna hnathawh vil hna chu tunlai thiamna hmanga an kalpui thu leh paper hman loa sorkar office hna thawk zel turin hma lak a nih thu a sawi a ni.

Chief Minister chuan tunlai thiamna lo thleng mek, digital transformation chuan Mizoram chhunga khaw tin, mitin a thlen theih nan theihtawp an chhuah thu a sawi a. Digital transformation chuan changkanna ngawr ngawr ni loin sorkar leh mipuite inzawmna tha zawk siamah a hlawhtlinna a awm thu a sawi a. Vawiina an hun hman chu sorkar leh ram chhunga industry pawimawh te thlunzawmtu pawimawh tak ni se a duh thu a sawi a ni.

Digital Transformation Conclave hi sorkar hruaitu, mithiam hrang hrang leh company hrang hrang te tunlai thiamna ti hmasawmna tur ngaihtuah tura an fuankhawmna hun a ni a. India ram hmun hrang hrangah hman thin a ni. Vawiina Mizorama hun hmanah hian ICT Minister Dr. Vanlalhlana, Chief Secretary Pu Khilli Ram Meena, DGP Pu Anil Shukla bakah sorkar laipui atanga a kaihhnawih hotu hrang hrang leh ramchhunga mithiamte an tel a ni.



CYBER ATTACK

Nizana Mizoram sorkar website Pakistan mi nia insawiin tihchingpen an tum chuan sorkar thil khawih pawl a neih loh thu leh siamthat a nih tawh thu Information & Communication Technology (ICT) department hotute chuan an sawi.

Akashvani in a kawmnaah he thu hi sawiin ICT hotute chuan tunhnaiah Mizoram sorkar website pahnih chu beih tum an awm anga an hriat thu leh heta langchiang tak chu nizana MPSC website beih tumna a nih thu an sawi a. A website luh chiaha screen lo langah thu thenkhat an rawn ziaak mai tih loh chu thildang khawih an neih loh thu leh data hloh engmah a awm loh thu an sawi a ni.

Tunhnaiah India ram chhunga website.gov.in tia awm ho chuan beih a tawh fo thu leh he beih tumna anga lang hi Mizoram tum rana thil tih bik lam ni loin a nawlpuia sorkar website a .gov.in tiha tawp hoah a lanchhuah theih thu an sawi a. MPSC pawh chutah chuan a lo tel ve palh mai nia an hriat thu leh hei hi siamthat har a nih loh thu leh Mizoram sorkar website beih tum nia hriat te hi siamthat nghal vek a nih thu an sawi a ni.

ICT hotute chuan tunah hian Mizoram sorkar website chu server thara tihsan mek a nih thu leh sorkar website pawh a chawp te tea an khawih that mek thu an sawi bawh a ni.

Nizana khan MPSC website chu beih tum awmin an website luhchiahin Pakistan mi anga insawiin thuziak an hnutchhiah a. Hetah hian saptawngin tawngkam uluk lo leh saptawng bel lo tih hriat taka ziaakin, Pakistan fakna leh India mite vauna thu a inziak a ni.



LADC

Lai Autonomous District Council vawiina Floor test neih tura Chairman Pu T. Zakunga'n Session a koh chu High Court thu angin thulh a ni.

Lai Autonomous District Council Sorkar buai chho mek ah hian Pu V.Zirsanga Court lama a zualkona chu nimin khan Gauhati High Court Aizawl bench chuan a ngaihtuah a,

Pu N.Zangura CEM atan ruat a nih danah LADC dan dinglai palzutna a awm thu te court ah hian sawilan niin, United Democratic Alliance Sorkar din nana hmalakna felhlel lai ni a ngaih te sawi lan niin, Sokar ukil lam pawn thil nih dan tlangpui a sawifiah a ni.

LADC Session neih tur chungchang ah Court chuan LADC Chairman Pu T. Zakunga'n May 16 a LADC Session a koh tawh chu kaltlangpuilo turin a ti a, LADC a UDA Sorkar din dan chungchang hi thla thar June 10 ah ngaihtuah leh atan a dah a ni.

Hetianga High Court in thu a dah tak vang hian LADC Chairman chuan May 16 a session neih tur chu kaltlangpui a nih loh tur thu hriattirna a chhuah nghal a ni.

LADC Floor test nei tur hian Larsap Gen (Rtd) Vijay Kumar Singh thupek angin LADC Chairman chuan May ni 16-a Session nei turin alo ko tawh a, Session ah CEM Pu N.Zangura'n thlawptu a neihdan fiahtura ruahman a ni a, High Court thu angin heihi kaltlangpui theih a i ta lo a ni.



MNF

Wawiin khan MNF Party te chuan an party pisa, Mizo Hnam Run, Aizawlah MNF Signatory leh MNF General Headquarters Adviser Chhinga Veng ami Pu Zoramthanga an sun.

Pu Zoramthanga (Signatory, Mizoram Independence Declacation) sunna hi MNF Vice President leh Leader of Opposition ni mek, MLA Pu Lalchhandama Ralte chuan a kaihruai a, a chanchin chhiar chhuakin, MNF leh Mizo hnamin hnam pasaltha signatory 61 zinga mi an chan chu pawl a tih thu a sawi a. Tun dinhmunah signatory parukin an la dampui tih sawiin lawmawm hle tih thu a sawi bawh a ni.

MNF Vice President chuan MLA inthlan lo awm leh turah Zoram mipuiin MNF chu sorkarna siam turin an beisei hle tih a sawi a. Hetih rual hian party inkaihhruaina siam thar a nih angin boruak tichhe thei zawnga ke pen lo tur leh party social media pawh thiam taka hman turin party mipuite a chah bawh a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah thin a ni. Zanin dar 6 leh a chanveah Chanchinthar puan leh a ni ang.



AWARENESS ON WATER CONSERVATION

PHE Department leh Lunglei Sub Headquarters YMA buatsaihin vawiin khan Tlawng lui humhalh inzirtirna hun YMA Sub Hqrs Conference Hall, Venglaiah hman a ni.

Tlawng lui humhalh inzirtirna inkhawm hi Pu CMS Dawngliana, Vice President, YMA Sub Hqrs Lunglei chuan kaihruaiin, Lunglei khawpui chhunga YMA Branch hrang hrang aiawhte bakah Tlawng lui hnar lama awm YMA Branch aiawhte an tel a ni.

Wawiina hun hman hian PHE Department-a Engineer in Chief Pu H Duhkima chuan hmanpuiin, Tlawng lui humhalh a tul dan leh humhalh tura tihtur hrang hrangte kalkhawmte a hrilh a. YMA Sub Hqrs Lunglei President Pu K.Lalfakzuala pawhin Tlawng luia tui hna tlem zel dan leh a chhan leh vang nia a hriatte sawi bawkin, tui

hna tipung tura hmalakna tur kawng hrang hrang a sawi a, zawhna leh chhanna hun hman a ni bawk.

Lunglei khawpui tuiiin tur lakna Tlawnglui humhalhna kal mekah Save Tlawng Project te chuan Tlawnglui a bawlhhlawh paih loh nan Pukpui luh dawn motor kanwgpui sir chu cement leh thirlen hmangin an hung a ni.

